

TE TAKIWĀ MAHARATANGA PAKANGA O TE MOTU TIROHANGA WHĀNUI, UARA, ME NGĀ TAUĀKI WHAKATAKANGA

Kupu Whakataki

He tuatahitanga tā te pānga o te Pakanga Nui o te Ao ki Aotearoa. O te 100,000 tāngata o Aotearoa i tū hei hōia ki tāwāhi i te Pakanga Nui o te Ao, tata ki te 17,000 o rātou kāore i hoki mai. I te hokinga mai ki te kāinga, he tokomaha rātou i pāngia kinotia e ō rātou wheako. I taua wā, i pāngia ngā tāngata katoa o Aotearoa e ora ana e te Pakanga Nui o te Ao, ahakoa i pāngia e te mahi hōia, e ngā wheako rānei ki te kāinga.

Huri noa Aotearoa he kaha te tūmanako kia whakamahara i tēnei parekura ki ngā whakamaharatanga tika, whai wāhi ko te whakamaharatanga pakanga ā-motu. I whakatūria e te Rūnanga o te Kāwanatanga te Kōmiti Maharatanga Pakanga o te Motu. I te hui tuatahi o taua kōmiti i te tau 1920 i whakaūngia te tirohanga whānui taketake mō te Maharatanga Pakanga o te Motu:

Me auaha te whakamaharatanga kia whakatinana i ngā whāinga me ngā uauatanga o te pakanga me ngā painga e puta mai ai. Mā reira ka tū hei whakaakoranga, hei whakamanawa i tēnei whakatipuranga me ngā whakatipuranga e heke mai nei, ā, ka arataki i te whakatinanatanga o te āhuatanga o Aotearoa. (Dominion, 18 Pepuere 1920)

Kāore te tirohanga whānui e whakarite i te āhua o te whakamaharatanga, ā, ka hipa te tekau tau ka whakaaetia he piana ā-pere, ā, ka tonoa he tauira whakamutunga. I taua wā kua tapirihia te whaakaro mō te maharatanga pakanga ā-motu ki te kaupapa mō te whare taonga ā-motu me te whare whakairi toi ā-motu i runga i Pukeahu (Mount Cook) i Te Whanganui-a-Tara. I mua i te taenga mai o te Pākehā ko te ingoa Māori ko Pukeahau, ā, ki te iwi Māori he wāhi tūpuna.


Mai i te whakaritenga o te Maharatanga Pakanga o te Motu i te Rā Whakamahara ki ngā Hōia o Ahitereiria me Aotearoa i 1932, kua haere ngā tāngata o Aotearoa ki ētahi atu pakanga, ā, ko te Pakanga Tuarua tētahi. Ka whakamaharatia ēnei pakanga, me ēnei tutū puehu ki te Maharatanga Pakanga o te Motu. Kua rerekēhia te Maharatanga Pakanga o te Motu, arā tērā te Hōro Hokinga Mahara (1964) me te Te Toma o Te Toa Matangaro (2004). Ko te Maharatanga Pakanga o te Motu te wāhi e tū ai ngā hui whakamahara ia tau, ia tau, pēnei i te Rā Whakamahara ki ngā Hōia o Ahitereiria me Aotearoa me te Rā Rangaawatea. Ka toro atu ngā manuhiri tūārangi, ngā tāpoi, ngā kura me te iwi whānui.

Ināianeī, tata ki te 100 rau tau i muri i te timatanga o te Pakanga Nui o te Ao, kei te puawai te Maharatanga Pakanga o te Motu. Mā te tāpiritanga o te Papa Rēhia, ka noho poka pū te Maharatanga Pakanga o te Motu i te takiwā i tohua hei wāhi whakahōnore i ngā wheako o ngā tāngata o Aotearoa i roto i te kauhanga riri, me ngā hononga pūmau i waenganui i Aotearoa me ētahi atu motu. Nā reira, e tika ana kia whakarite i te tauāki tirohanga whānui me te tauāki whakatakanga, ā, ki te whakaae anō i ngā uara e noho nei hei kaupapa mō te Maharatanga Pakanga o te Motu me te Takiwā whānui hoki. Mā ngā uara, te tauāki tirohanga whānui me te tauāki whakatakanga e arataki i te whakahaerenga o te Takiwā a te wā e heke mai nei.

Whakaaturanga o te Takiwā

E whā ngā wāhanga o te Takiwā:

- Wāhanga Tuatahi: Maharatanga Pakanga o te Motu – ko te ngākau pū o te Takiwā (ko te Piana ā-pere, Hōro Whakamaumahara me te Toma o te Toa Matangaro).
- Wāhanga Tuarua: Papa Rēhia Maharatanga Pakanga o te Motu – te Whakamaharatanga o Ahitereiria, ngā whakamaharatanga o ētahi atu motu, ngā whakamaharatanga o Aotearoa, ngā Māra Tāngata Whenua, me te Marae (Ātea rānei)
- Wāhanga Tuatoru: He wāhi whakaako, whakahaere, manaaki hoki. Ahakoa he wāhanga tēnei, ka tāea te whakapā ki ētahi atu o ngā wāhanga.
- Wāhanga Tuawhā: Ko te tikanga, kei waho tonu tēnei i te Takiwā, engari kei roto tonu i te ariā whānui. Kei roto i tēnei wāhanga ko te wāhi e karapoti i te Takiwā, arā te huarahi e hono ai i te Takiwā ki te tāone nui me te taha moana. Ko tēnei wāhanga he kōwhiringa mō ētahi atu whakamaharatanga.



Tauāki Tirohanga Whānui

Ko te kaupapa o te tauāki tirohanga whānui hei whakamanawa, hei arataki i a rātou e tohua kia tutuki i te tirohanga whānui. Ka whakarāpopoto te tauāki tirohanga whānui i ngā tutukitanga e tutukihia a te wā e heke mai nei.

Ko te Takiwā Maharatanga Pakanga o te Motu Pukeahu te wāhi o te motu tika mō ngā tāngata o Aotearoa kia maumahara, kia whakaaro mō te wheako o Aotearoa i roto i te pakanga, i te kauhanga riri me te hohou i te rongo, ā, kua pēhea te wheako e auaha i ō tātou whakaaro rangatira, i tō tātou tuakiri ā-motu.

Tauāki Uara

Inā tautuhi i te korahi me te arotahi o te Takiwā he kaupapa nui te tautuhi i ngā tino uara e noho hei pūtake mō tōna whanaketanga. Ko ēnei tino uara, e puta mai ai i ērā kua kōrerotia e te Kōmiti mō te Maharatanga Pakanga o te Motu i 1920. Ahakoa ka pūmau tonu, ko te whakaputanga o ngā uara ki tēnā whakatipuranga, ki tēnā whakatipuranga ka rerekē pea.

Te Hōnore me te whakanui

Ko te Takiwā Maharatanga Pakanga o te Motu Pukeahu he mihi ā-motu mō ngā whakahere tinana a ngā tāngata o Aotearoa me ētahi atu ki ngā pakanga, ki ngā kauhanga riri me te hohou i te rongo. He wāhi tēnei e mōhiotia ai, e whakamihia ai te hoahoatanga, te aroha, te toanga me te manawanui o ēnei tāngata.

Te whakamahara me te whaiwhakaaro

Ko te Takiwā Maharatanga Pakanga o te Motu Pukeahu te wāhi tika kia whakamahara, kia whaiwhakaaro te motu. He tohu i te whakapūmautanga o te motu e kore e warewaretia te mahi a ngā tāngata o Aotearoa me ētahi atu i ngā wā o te pakanga, o te raruraru taua me te houhou i te rongo.

Ranga wairua me te whakaako

Ko te Takiwā Maharatanga Pakanga o te Motu Pukeahu te wāhi e ranga wairua ai, e whakaako ai i ngā whakatipuranga o nāianei me ngā whakatipuranga e heke mai ai e pā ana ki te mahi a ngā tāngata o Aotearoa me ētahi atu ki ngā pakanga, ki ngā kauhanga riri me te hohou i te rongo.

Tuakiri ā-motu

Ko te Takiwā Maharatanga Pakanga o te Motu Pukeahu he wāhi mō ngā tāngata katoa o Aotearoa. Mā tēnei wāhi e āhei ai tātou ki te whakaaro e auaha pēhea ana te wheako o te pakanga, o te kauhanga riri me te hohou i te rongo i ō tātou whakaaro rangatira me tō tātou mōhiotanga ki te tuakiri ā-motu. He whakaputanga hoki o tō tātou kōrero tuku iho, ā, ka tautuhi mai a Aotearoa hei motu kanorau. Ko te Takiwā tētahi o ngā tohu whenua i roto i te tāone matua o te motu e whakaatu ai i ngā hoahoatanga pūmau i waenganui i Aotearoa me ētahi atu motu i puta mai i ngā wheako o te pakanga, o te kauhanga riri me te hohou i te rongo..

Tauāki whakatakanga

Ka tautoko te tauāki whakatakanga i te tauāki tirohanga whānui, ā, ka whakaatu i ngā mahi a tētahi rōpū, mā wai e mahi, ā, mā te aha e ea ai ngā tutukitanga e hiahiatia ana. He mea nui te tauāki whakatakanga nā te mea he tohu hei arahi i te ropu kia whai tonu i te tirohanga whānui.

Ko te tauāki whakatakanga o te Takiwā:

Kia whakarite i te wāhi pūmau mō ngā whakatipuranga o nāianei me ngā whakatipuranga e heke mai nei hei whakamahara i tō tātou wheako o te pakanga, o te kauhanga riri me te hohou i te rongo, ā, kia whaiwhakaaro e auaha pēhea ana taua wheako i ō tātou whakaaro rangatira me te whakaaro tuakiri ā-motu mā:

- *te whakahau me te whakatairanga i te whakamahi a te hāpori i te Takiwā;*
- *te whakawātea i te wāhi mo ngā hui me ngā mahi e tika ai mō te Maharatanga Pakanga o te Motu;*
- *te tiaki me te whakaniko i te wheako o te Takiwā Maharatanga Pakanga o te Motu;*
- *te whakamanawareka i ngā manuhiri ki ngā kōrero tuku iho e pā ana ki te pakanga, kauhanga riri me te hohou i te rongo mā te whakamārama me te whakaako;*
- *te whakatipu i ngā hononga rautaki kia whakatipu pai i te Takiwā Maharatanga Pakanga o te Motu Pukeahu.*